

REPUBLIC OF SOMALILAND
NATIONAL ELECTORAL COMMISSION



JAMHUURIYADDA SOMALILAND.
GUDDIDA DOORASHOYINKA QARANKA.

**XEERKA HAB-DHAQANKA XISBIYADA
SIYAASADDA EE DOORASHADA
MADAXTOOYADA
JAMHUURIYADDA SOMALILAND EE 2017**

**POLITICAL PARTIES CODE OF CONDUCT, FOR 2017
PRESIDENTIAL ELECTIONS**

26 SEPTEMBER, 2017

Handwritten signature in blue ink, with a small '1' above it and another signature below it.



**XEERKA HAB-DHAQANKA XISBIYADA SIYAASADDA EE DOORASHADA
MADAXTOOYADA (CODE OF CONDUCT)**

Ref: KDQ/XK/ 118 /017

Taar: 26/09/2017

AARAAR:

Saddexda Xisbi Siyaasadeed ee Qaranka Somaliland iyo Komishanka Doorashooyinku:

- ***Iyagoo ogsoon*** muhiimadda doorashada Madaxtooyadu ay u leedahay shacbiweynaha reer Somaliland.
- ***Iyagoo maanka ku haya*** in liiltirka iyo dhamaystirka guushu ku dheehan tahay ee geeddi socodka dimuqraadiyadeed ay waxtar weyn u leedahay qaddiyadda Madaxbannaanida Jamhuuriyadda Somaliland,
- ***Iyagoo aqoonsan*** in doorashooyin xor ah oo xalaal ah oo dalka ka dhacaa ay muftaax u yihiin kor u qaadista xorriyad iyo caddaalad taam ah oo ka taabbo-gasha gayiga Jamhuuriyadda Somaliland.
- ***Iyagoo dareensan*** khatarta iyo halista ku iman karta dimuqraadiyadda curdinka ah ee xilligan kala guurka ah ay u baahan tahay bisayl iyo dhaqan dimuqraadiyadeed oo ka hufan qabiil, gobolaysi, gacan ka hadal, caadifad, shakhsi weerar iyo nacayb.
- ***Iyagoo ogsoon*** baahida deg-degga ah ee loo qabo in la abuuro jawi suurto geliya inay qabsoonto doorasho xor ah oo xalaal ah, banyaal ah, la-xisaabtan leh, kuna dhisan doonista shacbi weynaha Jamhuuriyadda Somaliland.
- ***Iyaga oo maanka ku haya*** in dalka ay ka dhacday diiwaangelin hufan oo casriya, dalkana laga suurto galiyay in muwaadin kastaa yeesho hal cod oo kaliya, si sharciga waafaqsan.
- ***Iyagoo garawsan*** in Komishanka Doorashooyinka Qaranka, Hay'adaha Cadaaladda iyo Warbaahinta Gaarka loo leeyahayba ay u madaxbannaan yihiin hawlhooda isla markaana ay ka madaxbannaan yihiin Xisbiyada Siyaasadda;
- ***Iyagoo ku qanacsan*** muhiimadda ay leedahay in la abuuro dhaqan isku dulqaadasho siyaasadeed ku dheehan tahay (a culture of political tolerance); isla markaana aan

waxyello u gaysanahaynin Qiyamka iyo Hiddo-samida suubban ee dhaqanka iyo cirdiga qofka, oo ka reebban shakhsi cay, nasab cay, aflagaaddo, iyo isceebayn; taasoo dhaawac u gaysanaysa sharafta (cirdiga) qofka;

- **Iyagoo ogsoon** in meel looga soo wada jeedo danta iyo maslaxadda guud ee dalkan Jamhuuriyadda Somaliland, isla markaana sida Dastuurka iyo Shuruucda Doorashooyinku ay jideeyeen si nabad-gelyo ah ugu loollamaya hoggaanka siyaasadeed ee dalka;
- **Iyagoo aaminsan** in sida keliya ee hoggaanka dalka lagula wareegi karaa ay tahay rabitaanka iyo iraadada Shacbiga oo loo marayo sifo Sharci ah iyo hab nabadeed;

Waxa ay saxeexeen Xeerka Hab-dhaqanka Xisbiyadda Siyaasadda ee Doorashada Madaxtooyada 2017” waxaanay balan-qaadayaan in ay u hogaansamaan Xeerkan Hab-dhaqan (Code of Conduct for Political Parties) kaas oo ay saddexda Xisbi Siyaasadeed iyo Komishanku si wada jir ah isula oggolaadeen iyadoo ay Xisbiyada Siyaasadda iyo KDQ wada saxeexeen maanta oo ay taariikhdu tahay 26 September 2017.

QAYBTA KOWAAD

QODOBKA 1^{aad}: CINWAAN GAABAN

Xeerkan waxa loogu yeedhayaa “**Xeerka Hab-dhaqanka Xisbiyada Siyaasadda ee Doorashada Madaxtooyada Jamhuuriyadda Somaliland ee 2017**”.

QODOBKA 2^{aad}: QEEXITAAN

- 1) “**Komishan**”: Waxaa loola jeedaa Komishanka Doorashooyinka Qaranka Somaliland, ee lagu aasaasay Qodobka 11^{aad} ee Xeerka Doorashada Madaxtooyadda iyo Goleyaasha Deeganka (Xeerka Lr. 20/2001) ee wax laga bedelay 2017;
- 2) “**Xisbi/Xisbiyada**”: Waxaa loola jeedaa Xisbi ama Xisbiyada Siyaasadda;
- 4) “**Murashax**”: Waxaa loola jeedaa murashaxiinta u taagan jagooyinka Madaxweynaha iyo ku-xigeenka, ee tartamaya doorashada Madaxtooyada ee 2017, kaas oo uu soo sharaxay Xisbi gaar ahi, isla markaana ay oggolaadeen KDQ musharaxnimadiisa;
- 5) “**Mas’uul Xisbi**”: Waxaa loola jeedaa mas’uuliyiinta kala duwan ee Xisbiyada Siyaasadda, heerarkooda kala duduwan ee heer qaran, gobol, degmo, IWM.
- 6) “**Taageere Xisbi**” waxa loola jeedaa taageerayaasha lagu yaqaano in ay u ololeeyaan ama taageeraan xisbi gaar ah, ama taageerayaasha sita ama xidhan calamaanta, garamaanta, boodhadhka xisbi gaar ah.
- 7) “**Shaqale Dawladeed**” waxa loola jeedaa shaqaalaha dawlada ee ku qeexan Xeerka Shaqaalaha Dawladda (Xeer LR. 07/96).

3

QODOBKA 3^{aad}: DABBAQAADDA XEERKA HAB-DHAQAN

Xeerkan Hab-dhaqan waxaa lagu dabbaqayaa, kuna dhaqmaaya dhammaan hogaamiyeyaasha Siyaasadda, Murashaxiinta, Mas'uuliyiinta Axxaabta Siyaasadda, Mas'uuliyiinta Dawladda ee leh Magacaabista Siyaasadeed, Xubnaha Xisbiyada Siyaasadda, iyo taageerayaasha lagu yaqaan in ay Xisbi u ololeeyaan.


QODOBKA 4^{aad}: MABAADI'DA GUUD

Sharcinimada (legitimacy) dawlad lagu soo doortay nidaam Dimuqraadi ah oo ku salaysan doorasho xor ah oo xalaal ahi waxa ay ku iman kartaa:

- 1) Marka codbixiyeyaasha lagu war-geliyo (informed decision), laguna wacyigeliyo barnaamijka siyaasadeed ee Xisbiga ay dooranayaan iyo murashaxa ay u codaynayaan iyadoo taas loo maraayo olole doorasho oo caafimaad qaba;
- 2) Marka ay cod-bixiyeyaashu codkooda u dhiibtaan si madaxbannaan iyadoo aan lagu farogelinayn, la cabsi-gelinayn, laaluush ama khiyaamo kale loo adeegsanayn;
- 3) Marka ay Xisbiyada Siyaasadda iyo hoggaamiyeyaashoodu si niyad-sami ah (good faith) ugu dhaqmaan una ixtiraamaan Xeerka Hab-dhaqanka Xisbiyada Siyaasadda, Xeerarka Doorashooyinka, Xeerka Diiwaan-gelinta iyo Dastuurka;
- 4) Doorashadu waa cabiraadda (expression) rabitaanka iyo iraadada Shacbiga, go'aanka ka soo baxana waa in ay wada ixtiraamaan una hoggaansamaan dhammaan Xisbiyada u tartamaaya Hoggaanka Siyaasaddu (Political Parties).

QODOBKA 5^{aad}: UJEEDDADA XEERKA HAB-DHAQANKA

1. Ujeeddada Xeerkan Hab-dhaqanka Xisbiyada Siyaasadu waa in kor loo qaado waxyaalaha suurto gelin kara inay dhacaan doorashooyin xor iyo xalaal ah waxyaalahaas oo ay ka mid yihiin:
 - a) In la isugu dulqaato arrimaha siyaasadda ee dimuqraadiyadda ku dhisan;
 - b) In la abaabuli karo olole siyaasadeed oo xor ah iyo dood shacbiga u furan;
 - c) In la ixtiraammo lana dhawro Xuquuqda Aadamiga si waafaqsan Dastuurka iyo Shuruucda dalka JSL;
 - d) Xeerkan Hab-dhaqanku waxa uu kaabayaa Xeerarka Doorashooyinka iyo Diiwaan-gelinta, Dastuurka Qaranka, iyagaana marjac u ah.
2. Ujeedooyinka gaarka ah ee Xeerka Hab-dhaqanka waxa ma mid ah:
 - a. in uu qeexo hab-dhaqanka iyo anshaxa xisbiyada siyaasada ee Doorashada Madaxtooyada ee 2017
 - b. in lagu qeexo waxyaabaha ka reeeban xisbiyada doorashada horteed, doorashada dhexdeeda iyo doorashada kadib.
3. in uu dhiso Guddida Ilaalinta Anshaxa Doorashooyinka, isla markaana qeexo xilkooda iyo waajibadkooda.







QODOBKA 6^{aad}: KU DHAQANKA XEERKA HAB-DHAQANKA

Axsaabta Qaranka iyo murashixiintu iyaga oo fulinaaya Xeerkan Hab-dhaqanku waa:

1. Inuu Murashax kasta oo uu ogolaaday KDQ murashaxnimadiisa keenaa warqad saxeexan oo uu ku caddaynayo oggolaanshaha ku dhaqanka Xeerka Hab-dhaqanka doorashada Madaxtooyada isla markaana uu ku ballan-qaadayo inay taageerayaashiisu ku dhaqmayaan Xeerkan Hab-dhaqan (Declaration of Commitment);
2. Inuu Xisbi kasta muujiyo inuu u hoggaansan yahay ku dhaqanka Xeerkan Hab-dhaqan;
3. Inay ku wacyi-geliyaan taageerayaashooda, Wakiillada Xisbiyada, Xubnaha Xisbiga iyo Madaxdaba in ay ku dhaqmaan isla markaana ixtiraamaan meel-marinta iyo ku dhaqanka Xeerkan Hab-dhaqan;
4. Inay adkeeyaan joogteeyaanna wada shaqaynta ka dhaxaysa Komishanka Doorashooyinka Qaranka iyo Axsaabta Qaranka;
5. Inuu ka qaato tallaabo adag oo ka-hortag u ah in lagu xad-gudbo Xeerkan Hab-dhaqan;
6. Inuu qaado tallaabo kasta oo suurtoagal ah inaan la dhiirri-gelin wax kasta oo jabinaaya Xeerkan Hab-dhaqan;
7. In uu dadweynaha hortiisa ku cambaareeyo fal kasta oo minjo xaabin kara qabashada doorasho xor iyo xalaal ah.
8. In uu hubiyo in tartanka xisbiyadda kale u dhaxeeyaa uu noqdo mid ku dhisan is-ixtiraam iyo iskugu dul-qaadasho fikirka iyo mabaadiida kala duwan;
9. In uu kobciyo is-aaminaada iyo kalsoonida xisbiyada kale iyo KDQ isaga oo u maraya is-kaashi;
10. In uu maamulo oo yareeyo khilaafaadka xisbiyadda iyada oo loo marayo wada-hadal ku dhisan wax-wada-lahaansho;
11. In uu kor u qaado wada-hadalada iyo dood wadaagta xisbiyadda si loo xoojiyo midnimadda guud ee qarankan JSL;
12. Inuu ballan qaado inuu aqbalayo natiijada doorashada ama uu dacwad ka furto Maxkamadda Sare, haddii uu ku qanci waayo natiijada ku-meel gaadhka ah (provisional result), si sharciga waafaqsan.

QODOBKA 7^{aad}: XUQUUQDA DOORASHO EE DHINACYADA

Dhinacyada Xeerkan Hab-dhaqan wada saxeexay waa inay ogyihiin xuquuqdooda doorasho ee la xidhiidha:

- a. Dhiibashada ra'yiga siyaasadeed ee waafaqsan shuruucda Dalka;
- b. Ka doodista siyaasadda iyo barnaamijyada Xisbiga;
- c. Faafinta suugaan aan cid kale lagu weerarayn;
- d. Daabacaadda, qaybinta qoraalo war-galineed iyo xayaysiin aan cidna lagu weerarayn ama aan aflagaado ahayn;
- e. Dhejinta boodhadh, hal-ku-dhegyo waafaqsan Xeerka Nidaamka Guud iwm;

5

- f. Abaabulidda iyo qaadista ololayaal doorasho oo xor ah si waafaqsan Xeerarka, Shuruucda dalka, Xeerkan Hab-dhaqan iyo Dastuurka JSL;

QODOBKA 8^{aad}: MAAMULKA OLOLAHA DOORASHADA


Xisbi kastaa wuxuu ballan qaadayaa:-

- 1) Inuu maamuuso, qaddariyo, ixtiraamana xuquuqda iyo xorriyadda Xisbiyada kale inay ololeeyaan; inay faafiyaan aragtidooda siyaasadeed iyo mabaadii'dooda si aan gabbasho ku jirin; iyo inay si sharciga waafaqsan u taagaan, dhejiyaan halku-dhegyo, boodhadh, calaamadaha Xisbiyadooda si waafaqsan shuruucda wadanka iyo Xeerkan Hab-dhaqan IWM;
- 2) Inuu xaq-dhawro dhammaan xuquuqda saxaafadda, Gudigga Illaalinta Anshaxa Axsaabta iyo goob-joogayaasha doorashada (Observers);
- 3) Inuu ku dhaqmo jadwalka kaltanka maalmaha ololaha doorashada, ee ay soo saaraan Komishanka Doorashooyinka; oo aanu olole gelin (ololaynin) maalinta ama wakhtiga loo qoondeeyay Xisbiyada kale.
- 4) In uu xaqiijiyo in cod-bixiyeyaashu ay u madax bannaan yihiin go'aankooda iyo aragtidooda Siyaasadeed;
- 5) In aanu hanjabaad iyo caga-juglayn u gaysanin taageerayaasha iyo xubnaha Xisbiyada kale, isla markaana uu ixtiraamo xafiisyadooda iyo xarumaha iyaga u gaarka ah.
- 6) Luqada ay ku hadlayaan Xisbiyada Siyaasadda iyo hoggaamiyeyaashoodu waa in ay ahaato mid caafimaad qabta oo aan abuurayn iska hor-imaad dadweyne, xaalad abuur, kicin dadweyne, isku dir, colaad abuur, caadifad aan caqli ku dhisnayn iyo kala dil ummadda walaalaha ah. Isla markaana waa in aanay nabadgelyada iyo amniga qaranka wax u dhimayn.
- 7) Waxaa saaxadda Siyaasadda iyo ololaha doorashadda ka reebban shakhsi weerar, sharaf dil (character assassination) iyo caytan;
- 8) Xisbi kastaa isagaa mas'uul ka ah hab-dhaqanka Xubnaha Xisbigiisa iyo taageerayaashiisa; waxaanu waajib ka saaran yahay in uu ku war-geliyo Xeerkan Hab-dhaqan iyo Shuruucda kale ee Doorashooyinka.

QODOBKA 9^{aad}: WAXYAABAHA KA REEBBAN XISBIYADA WAKHTIGA DOORASHADA

Xisbi kasta waxaa ka reebban:

- 1) Inuu ku kaco hawlo wiiqi kara ama waxyeello u gaysan kara nabadgelyada iyo deggenaanshaha dalka ka-hor doorashadda, doorashada dhexdeeda, ama doorashada ka dib;
- 2) In uu ku kaco fal kasta oo waxyeello u geysan kara qaranimadda iyo israacsanaanta dhul ahaaneed ee Jamhuuriyadda Somaliland;
- 3) Inuu adeegsado hadallo aflagaado ah ama meel ka dhac ah oo sababi kara rabshado gacan-ka-hadal ah wakhtiga doorashadu socoto;

Jamaa  6









- 4) In uu ku ololeeyo hanaan ku dhisan qabyaalad, kala fogayn iyo nacayb, iyada oo qodobkan laga duulayo waxa reeban in la abaabulo taageerayaal, olole, isku soo bax, shir, ku dhisan qabyaalad ama ay ka muuqanayso weedho qabiil, ama qabyaaladeed, xisbi kasta waxa ka reeban in ay dhajiyaan hal-ku-dheg ay ka muuqato qabiil, qabyaalad, ama gobolaysi gaar ah;
- 5) Inuu baqo-geliyo murashaxiinta, wakiillada Xisbiyada, xubnaha ama taageerayaasha Xisbiyada kale;
- 6) Inuu arbusho ama khalkhal geliyo ololaha Xisbi kale;
- 7) In uu burburiyo, weeraro ama qabsaddo xafiisyadda iyo fagaarashaasha xisbiyadda kale;
- 8) In uu burburiyo, jeexjeexo, baabiiyo, la wareego, ka hor yimaado wacyigelinta codbixiyayaasha, ama qoraalada, calaamadaha, calammada iyo boodhadhka Xisbi kale;
- 9) Inuu iska hortaago qaybinta qoraalada, ama muujinta hal-ku-dhegyo ama samaynta banaanbax, kulammo, socod ama dhoolla-tus uu leeyahay Xisbi kale, ama iska hortaago Xisbi kale inuu dadweynaha la xidhiidho; ama u diido taageere in uu ka qayb-galo banaanbax Xisbi kale
- 10) Inuu u oggolaado taageerayaasha Xisbigiisa inay ku kacaan wax kasta oo Xeerkani mamnuucay.
- 11) Inuu sameeyo olole ama bannaan-baxyo Siyaasadeed xilli aan ugu xusnayn jadwalka saami-qaybsiga ololaha doorashada.
- 12) Xisbina xoog kuma qabsan karo goob-doorasho si uu xoog ugu buux-buuxsado codadka goobtaas cod-bixineed (procuring votes by occupation of a polling station) umana adeegsan karo qaabab sharci darro ah goob codbixineed si uu uga helo codad sharci darro ah, iskamana hortaagi karo Xisbi kale codad uu sharci ku heli lahaa. Qodobkani xisbiga, taageerayaasha, iyo murashaxa ku kaca ee lagu helo waxa ciqaabtiisa loo raacayaa si waafaqsan Qodobka 67aad farqadihiisa 4aad iyo 5aad.
- 13) Xisbiyadda waxa ka reeban in ay isku dayaan in ay dadweynaha laaluushaan, cabsi-geliyaan, u hanjabaan ama saamayn aan haboonayn ku kasbadaan codkooda, cid kasta oo ku kacda falka ku xusan farqadan waxa ciqaabtiisa loo raaci doona si waafaqsan farqada sare ee Qodobkan.
- 14) Xisbiyadda iyo taageerayaashooda waxa ka reeban in ay ka dhex ololeeyaan goobaha cod-bixinta, keenaan ama la yimaadaan goobaha cod-bixinta hal-ku-dhegyo muujinaya ama ka tarjumaya calaamad xisbi, calan, boodh, ama wax kasta oo loo qaadan karo in uu yahay olole maalinta cod-bixinta iyo 24ka saacadood ee ka horeeya.
- 15) Xisbiyaddu iyo taageerayaashoodu ma samayn karaan dabaal-deg ka hor ku dhawaaqista natiijada, ama samayn karaan natiijo male-awaal ah, oo khal-khal gelin karta nabadgelyada guud ee dalka JSL, mana abaabuli karaan banaanbax lagaga soo horjeedo doorashada ama natiijada doorashada;

QODOBKA 10^{aad}: REEBBANAANTA ISTICMAALKA IYO HAYSASHADA
NOOCYADA HUBKA

1. Murashaxiinta, Xubnaha Xisbiyada Siyaasadda, Wakiillada Xisbiyada iyo taageerayaashoodaba waxaa ka reebban kana mamnuuc ah in ay noocyada hubabka kala duwan u soo qaataan meelaha dadweynuhu isugu soo baxo (Public Gatherings), shirarka, goobaha ay ka socoto cod-bixinta doorashadu, iyo goob kasta oo uu ka socdo olole Xisbi kale.

James  7




2. Ilaalada gaarka ah ee ay Musharixiinta Xisbiyaddu wataan waa in ay ka mid noqdaan ciidanka booliska JSL.

QODOBKA 11^{aad}: TALLAABOYINKA KA REEBBAN XUKUUMADDA

- 1) Waxaa reebban in ay Xukuumaddu u adeegsato Xoogagga Nabadgelyada sida Ciidanka Booliska, Asluubta, Sirdoonka iyo Ciidanka Qarankaba in lagu cabudhiyo Murashaxiinta Xisbiyada Siyaasadda iyo taageerayaashooda;
- 2) Qofna lama xidhi karo iyadoo uusan jirin Waaran Maxkamadeed (Warrant of Arrest); marka laga reebo xaaladaha uu Xeerku jideeyey in Boolisku uu qaban karo qof lagu tuhunsan yahay in uu gaystay faldambiyeed;





QODOBKA 12^{aad}: DHEXDHEXAADNIMADA HANTIDA IYO ADEEGYADA QARANKA (NEUTRALITY OF PUBLIC OFFICES, ASSETS AND FACILITIES)

- 1) Hantida Qaranka waa loo siman yahay, loomana adeegsan karo in loogu adeego danaha Xisbi gaar ah.
- 2) Shaqaalaha dawladu way ka reebban tahay in ay xisbiyadda ka mid noqdaan, loomana ogolla in ay u ololeeyaan xisbi gaar ah, waxaa reebban in shaqaalaha dawladu u ololeeyaan xisbi gaar ah ama in ay ku dhex milmaan hawlaha xisbiyadda iyo ololahooda.
- 3) Ciidamada Booliska, Asluubta iyo Ciidanka Qaranku waa in ay ka fogaadaan oo aanay ku dhex milmin arrimaha Siyaasadda isla markaana waa in ay ahaadaan dhexdhexaad, shaqadoodana ku eekaadaan.

QODOBKA 13^{aad}: GEEDDI-SOCODKA DOORASHADA

Xisbi kasta waxaa ku waajib ah:-

- 1) Inuu wada shaqayn la yeesho Komishanka Doorashooyinka Qaranka, saraakiisha iyo hawl-wadeenada KDQ, iyo Xisbiyada Kale si loo xaqiijiyo codbixin u dhacda si nabadgalyo iyo habsami ah kuna dhammaata in si xornimo ah codbixiyayaashu u gutaan xuquuqdooda qarqalad la'aan iyo cabsi la'aan, si waafaqsan sharciga;
- 2) in uu dhawro isla markaana xaqiijiyo nabadgelyada hawl-wadeennada doorashada iyo xubnaha Komishanka Doorashooyinka Qaranka xilliga u diyaar-garawga doorashada, cod-bixinta, tirinta iyo ku dhawaaqidda natiijada;
- 3) In ay ka hor tagaan fal-dambiyeed kasta oo suurto-gal ah in uu dhaco xilliga doorashada kaasoo ku saabsan hawlaha doorashada (electoral offences);
- 4) Inuu qaato tilmaan kasta oo sharci ah una hoggaansamo awaamiirta Komishanka Doorashooyinka Qaranka, si sharciga waafaqsan;
- 5) Inaanu sinaba u farogelin shaqada KDQ iyo saraakiisha doorashada;
- 6) Inuu qaddariyo lana shaqeeyo goob joogayaasha (observers) iyo Guddida Illaalinta Anshaxa Doorashooyinka.
- 7) Inuu dhawro isla markaana ixtiraamo qarsoonaanshaha (sir ahaanshaha) codbixinta.

- 8) In uu xoojiyo kana qayb-qaato isfahanka guud ee daneeyayaasha doorashada, isla markaana abuurin jawi khalkhal gelin kara ama dhibaato u gaysan kara doorashada;
- 9) In uu hubiyo in dhamaan bulshada ay u furan tahay ka qayb-galka siyaasadu,
- 10) In uu muujiyo dhaqan bisayl dimuquraadiyadeed ku dheehan tahay, oo hufan, isla markaana kor uqaado hanaanka doorashooyinka, si hufana ugu tartamo doorashada;
- 11) In uu ixtiraamo, ku dhaqmo, difaaco, xoriyadda iyo xuquuqda aasaasiga ah ee muwaadiniinta ee uu damaanad qaaday Dastuurka Jamhuuriyadda Somaliland, Xeerarka Doorashooyinka, Xeerkan Hab-dhaqan, Xeerka Diiwaangelinta iyo shuruucda Jamhuuriyadda Somaliland;
- 12) In uu dhawro qiyamka iyo aaminaada bulshada JSL;
- 13) In uu ilaaliyo sharafta bani'aadanka, isla markaana meel ka dhac iyo ceebayn aanu ku samayn sharafta, karaamada iyo sumcadda qofka iyo bulshada midbanaba;
- 14) In uu difaaco, ku dhaqmo, ixtiraamo xeer hoosaadyadooda gaarka ah (dastuuradooda), iyo shuruucda xisbiga u gaarka ah;
- 15) In uu xoojiyo waddaniyadda iyo midnimadda dalka Jamhuuriyadda Somaliland;
- 16) In uu xoojiyo, ixtiraamo, kobciyo mabaadiida maamul wanaaga, isku-dulqaadashada, is-ixtiraamka, banyaalnimadda, iyo isla xisaabtanka;
- 17) Inuu kobciyo kana qayb-galo tartan hufan oo xor iyo xalaal ah;

QODOBKA 14^{aad}: DOORKA SAXAAFADDA

Saxaafadu waa Waax ka mid ah Waaxyaha waawayn ee Qaranka.

Saxeexayaasha Xeerkani Hab-dhaqan waxay ixtiraamayaan Mas'uuliyadda saaran Saxaafadda Madaxbannaan iyo tan Dawladdaba. Sidaas awgeed, Saxaafadda Madaxa bannaan iyo tan Dawladduba waa:


- 1) In ay dhiirri-geliyaan ku dhaqanka Xeerka Hab-dhaqanka;
- 2) In ay Ummadda ku wacyi-geliyaan ku dhaqanka iyo dhawrista Xeerkan Hab-dhaqan;
- 3) In ay faafiyaan Xeerkan Hab-dhaqan, gaadhsiiyaana bulshada. Sidoo kale waa in ay tixgeliyaan Xeerkan.
- 4) Warbaahinta ay leeyihiin xisbiyadda Qaranka sida bogooda Internetka, Youtube ka, iyo bogaga ay ku leeyihiin warbaahinta Bulshada (social media), waa in ay ixtiraamaan, kuna dhaqmaan Xeerarka Hab-dhaqanka.
- 5) Saxaafadu waxa ay yeelan doontaa Xeer Hab-dhaqan oo u gaar ah, muddada doorashada.

QAYBTA LABAAD

GUDDIDA HAWLEEDKA XISBIYADA

QODOBKA 15^{aad}: AASAASID

Si loo aburo jawi is-faham oo u dhaxeeya Xisbiyada Siyaasadda isla markaana loo dhaqan-geliyo Xeerkan, waxaa la abuuray Guddida Hawleedka Xisbiyadda







Siyaasadda (Task Force Committee). Sidaas darteed;

- 1) Guddidu waxay fududaynaysaa xidhiidh iyo isfaham u dhaxeeya Xisbiyada Siyaasadda ee tartamaaya iyo KDQ
- 2) Guddidu waxa ay noqonaysaa Xarun wada hadal (Forum for Dialogue) iyo wada xaajood oo u dhaxaysa Xisbiyada Siyaasadda;
- 3) Guddidu waxa ay ka koobnaanaysaa Saddexda Xisbi Siyaasadeed oo uu mid waliba soo diran doono laba wakiil;
- 4) Guddidu waa mid la talineed oo KDQ gacan ka siinaysa in Xisbiyadu ay yeeshaan wada xaajood siyaasadeed;
- 5) Guddidu awood uma laha in ay awaamiir siiso KDQ iyo in ay ku xad-gudubto awoodaha uu sharcigu siiyay KDQ, waxase ay leeyihiin soo jeedin;
- 6) Guddidu waxa ay yeelanaysaa shirar joogto ah oo toddobaadkiiba hal mar ah. Haddii aanay jirin arrimo deg deg ahi.

QODOBKA 16^{aad}: SHAQADA GUDDI HAWLEEDKA

Guddi Hawleedku waxa ay shaqadeedu noqonaysaa:

- 1) In ay ahaadaan xarun ay ku doodaan Xisbiyada Siyaasaddu oo lagaga hadlo wax-qabadka iyo hab-sami u socodsiinta hawlaha doorashada;
- 2) In ay dhiirigeliyaan in Xisbiyada Siyaasaddu ay ku dhaqmayaan isla markaana ixtiraamayaan Xeerkan Hab-dhaqan, Xeerarka Doorashooyinka, Diiwaangelinta iyo Dastuurka;
- 3) In ay noqdaan birijka isku xidhaaya Xisbiyada Siyaasadda iyo Komishanka Doorashooyinka Qaranka;
- 4) In ay xallilaan khilaafaadyada ka dhex-dhasha Xisbiyada dhexdooda (amicable solution) si waafaqsan Xeerkan Hab-dhaqan iyo Xeerarka Doorashooyinka iyo Diiwaan-gelinta;
- 5) In ay hubiyaan in Xisbiyadoodu u hogaansan yihiin Xeerka Hab-dhaqanka, isla markaana xaqiijiyaan fulinta iyo ku dhaqanka Xeerkan, iyo awaamiirta kasoo baxda KDQ iyo Guddida Ilaalinta Anshaxa.

QODOBKA 17^{aad}: MAALIYADDA GUUD, HANTIDA IYO WARBAAHINTA DAWLADDA

Qodobka 26aad ee Xeerka Doorashada Golaha Wakiiladda (Xeer Lr. 20-2/2005), wuxuu Komishanka Doorashooyinka Qaranka u xilsaarayaa in uu hubiyo in Xisbiyada Qaranku si siman u isticmaalaan warbaahinta dawladda iyo fagaarayaasha khayriyadaha. Qodobku waxa kale oo uu xusayaa inaan Xisbina hantida ummadda u adeegsan karin ujeedooyin u gaar ah. Qodobku wuxuu KDQ awood u siinayaa inuu ganaax maamul ahaaneed ku rido cid kasta oo ku kacda fal liddi ku ah habsami-u-socodka doorashada ama Xeerarka iyo nidaamka doorashada.

Si uu xilkiisaa u gutto, Komishanku wuxuu diyaarinayaa hawlaha farsammo ee hoos ku qoran si uu u xaqiijiyo u-hoggaansanaanta Xeerka iyo nidaamka doorashada:

10

1. Adeegsiga Warbaahinta Dawladda

A. Barnaamijyada Raadhiyaw Hargeysa Iyo Telefishanka Qaranka

Qaabka Fulinta:

- Heerka Koowaad: La-socodka Xilliga Ololaha
- Heerka Labaad: Wakhti-u-qaundaynta Xisbiyada Xilliga Ololaha

Heerka Koowaad: La-socodka maalinlaha ah ee barnaamijyada af-Soomaaliga ah ee ka baxaya Raadhiyaw Hargeysa iyo TV-ga Qaranka

Komishanka Doorashooyinka Qaranku wuxuu la soconayaa, isla markaana ilaalinayaa barnaamijyada maalinlaha ah ee af-Soomaaliga ah ee ka baxaya Raadhiyaw Hargeysa ee la xidhiidha ololaha doorashada. La-socosho taas oo kale ah ayaa lagu samaynayaa TV-ga Qaranka.

Heerka labaad: Uga-qaundaynta Wakhti Is-le'eg Raadhiyaw Hargeysa iyo TV-ga Qaranka saddexda Xisbi Siyaasadeed

Komishanka Doorashooyinka Qaranku, isagoo ka duulaya u sinaanta wakhtiga hawo-ku-jiridda, isla markaana kala tashanaya Wasaaradda Warfaafinta iyo Wacyigelinta iyo Xisbiyadda ayuu wakhti is-le'eg u qaodaynayaa saddexda Xisbi Siyaasadeed. Shaxda qeexaysa u-qaybinta saddexda Xisbi wakhtiga hawo-ku-jiridda, waxa loo aqoonsanayaa inuu lifaaq u yahay Xeerkan Hab-dhaqan.

B. Wargeysyada Dawladdu Maamusho

Komishanka Doorashooyinka Qaranku, wuxuu labadan ku-tala-gal ee hoos ku qoran ka yeelanayaa wargeysyada Dawladdu Maamusho:

1. La-socoshada maalinlaha ah ee qoraallada ku soo baxa Wargeysyada dawladdu maamusho.

2. Uga-qaundaynta saddexda Xisbi Siyaasadeed bogagga wargeysyada dawladdu maamusho bed (space) is-le'eg.

Faahfaahinta ku-tala-galkan waxa goynaya Xisbiyada, KDQ iyo Wasiirka Warfaafinta, waxaana loo aqoonsanayaa inuu lifaaq u yahay Xeerkan Hab-dhaqan.

C. Warbaahinta Gaarka Loo Leeyahay

Warbaahinta gaarka loo leeyahay waa inay si siman u soo gudbisaa afkaarta Xisbiyada Siyaasadeed ee diyaarka u ah inay ka iibsadaan warbaahinta gaarka loo leeyahay bed (space) ay ku soo qoraan afkaartooda. Waa inaan Xisbiyada lagu kala faquuqin arrintan. Qodobkan waa in lagu daraa Xeerka Hab-Dhaqanka Warbaahinta Madaxa Bannaan. Buugga Tilmaan-bixiyaha Warbaahintuna (the Media Guide) waa inuu si cad u xuso

baahida loo qabo in warbaahintu si isu-dheelli-tiran oo wax-ku-ool ah u soo tebiso wararka.

Noocyada Warbaahinta midkoodna ma diidi karo inuu daabaco ama baahiyo aragti Xisbi, haddii Xisbigaasi bixinayo kharashka caadiga ah ee bedka (space) wargeys ama wakhtiga baahineed. Haddii nooc warbaahineed uu ku kaco falkaa reebban, Xisbiga ay khusaysaa waa inuu cabasho u gudbiyo Guddida Illaalinta Hab-sami-u-socodka Saxaafadda, guddidaas oo ka qaadaysa arrintaas tallaabo kasta oo sharciyeed oo ku habboon ama siyaasadeed oo lagama maarmaan ah si loo suurto-geliyo in warbaahintu gudato mas'uuliyadda ay u hayso ummadda.

2 .Hantida iyo Maaliyadda Guud

Qodobka 26aad ee Xeerka Lr. 20-2/2005 wuxuu mamnuucayaa in Xisbi u isticmaalo ujeeddadiisa gaarka ah hantida guud. Qodobku waxa kale oo uu xusayaa inaan Xisbina si toos ah iyo si dadban toona u isticmaali karin hanti shisheeye leeyahay, sida Ururradda Samafalka ee debedda iyo Hay'adaha Qarammada Midoobey.




Waxa Intaa dheer, Qodobka 64^{aad} ee isla Xeer Lr. 20-2/2005 wuxuu awood u siinayaa Komishanka Doorashooyinka Qaranka inuu samayn karo ganaax maamul ahaaneed.

Si loo dhaqan-geliyo qodobbadan, Komishanka Doorashooyinka Qaranku:

- a) Wuxuu hubinayaa in saddexda Xisbi Siyaasadeed u siman yihiin maaliyadda guud, warbaahinta dawladda iyo fagaarayaasha dadweynuhu isugu soo baxaan.
- b) Wuxuu xaqiijinayaa in, xilliga doorashada, aan Wasiirrada Xukuumaddu u adeegsan gaadiidka dawladda u ololaynta Xisbiga ay ka tirsan yihiin.
- c) Waa inuu maskaxda ku hayo inaan shaqaalaha dawladda loo oggolayn, inay u ololeeyaan Xisbi. U-ololaynta uu qof shaqaale ahi u ololeeyo Xisbi waxay xad-gudub halis ah ku tahay maamulka nidaamka doorashada, Komishanka Doorashooyinka Qarankuna wuxuu kaga soo oogayaa qofkaas tallaabada anshax-marineed ee habboon.
- d) Si loo horumariyo is-aaminaadda iyo kalsoonida Xisbiyadu isku qabaan, isla markaana loo abuurto jawi habboon oo doorashadu si hab-sami ah ugu qabsoonto; waxaa lagama maarmaan ah in xukuumaddu ka joogsato fal kasta oo ah ku-takri-fal awoodeed. Sidoo kale, waxa lagama maarmaan ah in Xisbiyada Siyaasadeed ay iska ilaaliyaan fal kasta oo halis ku ah nabadgelyada iyo xasilloonida.

Si uu Komishanka Doorashooyinku awood ugu yeesho inuu si fiican ugu gutto waajibaadkiisa, waa in arrimahan la helo:

- Wareegto Madaxweyne oo amraysa saraakiisha ciidamadda iyo Xukuumadda inay wada-shaqayn buuxda la yeeshaan KDQ, iyo hay'ad kasta oo KDQ gacan ka siin karta gudashada waajibaadkeeda Qaran.


12



- Wareegto Madaxweyne oo si rasmi ah u mamnuucaysa u-adeegsiga gaadiidka dawladda olole siyaasadeed iyo in lagu dhejiyo astaan Xisbi, hal-ku-dheg Xisbi iwm. Xafiisyada, kaamboollada iyo gaadiidka dawladda.
- Wareegto Madaxweyne oo lagu fulinayo laguna adkaynayo in aan shaqaalaha dawladdu geli karin olole siyaasadeed, waqtiga tartanka xisbiyadda siyaasadda.
- Wareegto Madaxweyne oo lagu adkaynayo laguna hirgelinayo u sinaanta warbaahinta dawladdu maamusho, sida Raadyoow Hargeysa, TV ga Qaranka, iyo Wargeyska Dawan;

Komishanka Doorashooyinka Qaranka ayaa ka mas'uul ah inuu ka keeno Madaxweynaha wareegtooyinka kor ku xusan.

QAYBTA SADDEXAAD

QODOBKA 18^{aad}: XAALADO GAAR AH



1. Xeerarka La Xidhiidha Isu-Soo-Baxyada

Qodobka 34^{aad} ee Xeer Lr. 20/2001 wuxuu KDQ siinayaa in ay diyaariyaan soona saaraan shaxda isku soo baxyadda, iyo dhoola-tusyadda qorshaysan ee Xisbiyadda oo ah tiro maalmo ah oo isleeg, waxanu farayaa Wasaarada Arrimaha Gudaha Guddoomiyayaasha Gobolada iyo Degmooyinka in ay ku dhaqmaan shaxda Komishanku soo saaro, sidaa darted:

- a) Komishanku waa in uu tiro maalmo ah oo is leeg xisbiyadda siiyaa si waafaqsan sharciga;
- b) Haddii ay dhacdo nabadgalyada awgeed in laga baqo in rashshad, gacan ka-hadal ama dhibaato kale ka imaanayso isku-soo-bax xisbi, hay'adaha ay khuseysaa waxa ay codsi sababaysan usoo gudbin doonaan Komishanka oo awood u leh in uu ka diido ama ka ogolaado ka dib marka uu qiimeeyo xaalada markaa taagan, kuna xisaabtamo heerka cabsida jirtaa leeg tahay;
- c) Xisbiga ay ololihisa laga joojiyay waxa uu xaq u leeyahay in la siiyo maalin kale oo deegaankaasi laga joojiyay ka qabsado ololihisa;

2. Dhaqdhaqaaqa Gaadiidka ee Maalinta Doorashada

Iyadoo la raacayo sida uu jideynayo Qodobka 27^{aad} ee Xeer Lr. 20-2/2005, waxa la mamnuucay dhaqdhaqaaqa baabuur kasta oo dadweyne, dawladeed ama gaar ahaaneed maalinta doorashada laga bilaabo 06:00 subaxnimo ilaa 08:00 fiidnimo.


 13


Komishanka Doorashooyinka Qaranka ayaa ah Hay'adda keliya ee awood u leh bixinta oggolaansho dhaqdhaqaaq baabuur maalinta cod-bixinta, si loo meelmariyo adeegyada guud ee aasaasiga ah iyo habsami-u-socodka doorashada. KDQ gaadiidka adeegyadaas guud iyo habsami-u-socodka doorashada lagu fulinayo wuxuu siinayaa warqad xabag leh (sticker), ama lambar oo muujinaysa oggolaanshaha KDQ ee dhaqdhaqaaqa baabuurka ee maalintaas cod-bixinta. Baabuur kasta oo aan maalinta codbixinta sidan oggolaansho dhaqdhaqaaq oo KDQ bixiyey, waxa qabanaya ciidanka boliiska waxaana la sii deynayaa ka dib 08:00 fiidnimo ee isla maalintaas.

3. Wakiillada Xisbiyada

Qodobka 29 (5) ee Xeerka Lr. 20-2/2005 wuxuu qeexayaa in KDQ uu wakiillada Xisbiyada u tababaro waajibaadkooda, isla markaana uu u oggolaado Xisbiyada inay u kala beddeshaan wakiillada siday doonaan; halkaa waxa lagala soo bixi karaa in wakiil tababaran oo keli ahi uu noqon karo muraaqib (wakiil) goob codbixineed, degmo ama gobol doorasho.

Xisbiyadu waxay ku heshiiyeen sidan:


Haddii ay baahiyo timaaddo, Xisbiyadu way beddelan karaan wakiilladooda Xisbi, laakiin waa in kuwa lagu soo beddelayaa noqdaan uun wakiilladii kaydka ahaa ee KDQ tababaray. Waajibaadka wakiilka Xisbi waxa lagu sheegi doona tilmaamaha bixiyo; dhinacyada kale ee kaalintooda shaqo oo dhan waxa loo raacayaa Qodobka 37^{aad} ee Xeerka Doorashada Goleyaasha Deegaanka iyo Madaxtooyada.

4. Cod-dhiibashada

Qodobka 48 (4) ee Xeer Lr. 20/2001 aad buu u cad yahay una kooban yahay, marka la eego halka uu cod-bixiyuhu ka calaamadinayo warqadda cod-bixinta. Marka lagu xisaabtamo xaqiiqda ah in tiro aad u badan oo ah dadweynaha Somaliland aanay wax akhriyi karin waxna qori karin, suurto-galnimada ay dad aad u badani ku cod waayayaan, akhris-qoris-la'aantaa sarraysa darteed, meesha lagama saari karo. Si looga badbaado xaaladdaas Xisbiyadu waxay ku heshiiyeen sida hoos ku cad oo waafaqsan hab-dhaqankii lagu soo maamulay doorashooyinkii hore:

Cod-bixiyaha waxa loo oggol yahay in uu calaamadiyo meel kasta oo ka mid ah qaybta warqadda cod-bixinta ee loo gaar yeelay Xisbiga uu codkiisa siinayo. Calaamad kasta oo uu cod-bixiye ku qoro warqadda cod-bixinta, sida dhibic, isku-tallaab, xarriijin, sumad, calaamadda saxnimada, waa la aqbalayaa, illaa inta ay calaamaddu si bayaan ah ugu jirto qaybta warqadda ee Xisbi u gaar ah, isla markaana si fiican loo arki karayo.

Haddii calaamadintu ay cod-bixiye si weyn ugala gudubto qaybta warqadda ee Xisbi u gaar ah codkaa waxa lagu tirinayaa wax-kama-jiraan. Si kastaba ha ahaatee, codka waxa loo tirinayaa mid sax ah oo la qaato, haddii ay muuqato in ku-tala-galka cod-bixiyuhu ahaa in uu Xisbi gaar ah codka siiyo oo tusaale ahaan, ay calaamadda inteeda badani ku gudo-jirto qayb warqadda cod-bixinta ah oo Xisbi u gaar ah, in yar se ay ku dacad-dhawday qaybta warqadda ee Xisbi kale.



5. Diidmada Wakiil Xisbi diido in uu Saxeexo Natiijada

Qodobka 53 (2) ee Xeer Lr. 20/2001 wuxuu ku waajabinayaa in dhammaan wakiillada Xisbiyadu ay saxeexaan xaashida natiijada ama qoraal uu ku soo gudbiyo sababta uu u saxeexi waayay. Si kastaba ha ahaatee, weli waxa jira suurto-galnimada in wakiil Xisbi ama laba jooqey xafiis doorasho ay si badheedh ah u diidaan saxeexidda, ama ay dhuuntaan intaan la gaadhin saxeexidda natiijada goobta.

Si loo xalliyo arrintaa Xisbiyadu waxay ku heshiiyeen sidan soo socota:
Si looga badbaado luminta codadka ay muwaadiniintu dhiibteen, waxa ku filan saxeexidda laba wakiil amah al wakiil iyo Guddoomiyaha iyo Guddoomiye-ku-Xigeenka Xafiiska Doorashada. Si kastaba ha ahaatee, sababaha dhacdaaas waa in qoraal ahaan loo diiwaan-geliyo.

Wakiilka Xisbi ee ay la noqoto inaanu saxeexin natiijadda waa inuu sababta uu u saxeexi waayey qoraal ku caddeeyo laguna rido baqshaddaha. Wakiilka Xisbi ee saxeexi waaya baqshadda ama sababta uu u saxeexi waayey oo qoraal ah raacin waaya baqshaddaas, waxa KDQ u gudbinayaa hay'adaha sharci fulinta si loogu oogo xil-gudasho-la'aan.

QODOBKA 19^{aad}: NIDAAMKA LOO RAACAYO SOO SAARISTA LIISKA COBBIYIYEAASHA AH




Nidaamka liiska cob-bixiyeyaasha kama danbaysta ah loo soo saarayo waxa loo raacaayaa Xeerka Diiwaangelinta Codbixiyayaasha.

QODOBKA 20^{aad}: DAABACAADA IYO SOO SAARISTA LIISKA COBBIYIYEAASHA

Sida ay tilmaamayaan Qodobbada 4^{aad}, Farqadiisa 2^{aad}, 5^{aad}, 7^{aad}, farqadiisa 2^{aad}, 37^{aad} iyo 38^{aad} ee Xeerka Diiwaangelintu Xeer Lr. 37/2007, ee wax-ka-bedelka lagu sameeyay 2014 iyo 2016, waxa ay jideenayaan soo saarista diiwaanka codbixiyaha ee kama danbaysta ah oo uu Komishanku u xil saaran yahay. Xisbi kasta oo siyaasadeed waxa uu xaq u leeyahay in uu la socdo habaynta, dhaqangelinta iyo daabacaadda liisaska Diiwaanka.

QODOBKA 21^{aad}: SOO SAARISTA LIISKA KAMA DANBAYSTA AH

- 1) Marka la diiwaangeliyo dhammaan wixii isbedel ah, waxa la diyaarinayaa liiska kama danbaysta ah oo noqonaya liiska uu Komishanka Doorashooyinku amri doono in laga daabaco dhammaan liisaska loo baahan yahay ee xaq u leh in ay codeeyaan sida ay waajabinayaan Xeerarku.
- 2) Diiwaanka codbixiyaha ee kama danbaysta ah waxa nuqulo laga siin doonaa Wasaaradda Arrimaha Gudaha iyo Xisbiyadda Siyaasadda.


15



QODOBKA 22aad: XALLINTA KHILAFAADKA XISBIYADDA (CONFLICT RESOLUTION)

- 1) Xisbiyada Siyaasaddu waxa ay muran iyo khilaaf kasta oo ka dhex dillaaca kuna saabsa, Xeerkan ku xallinayaan wada hadal iyo is-afgarad (amicable solution);
- 2) Haddii ay Xisbiyadu ku guulaysan waayaan in ay khilaafka dhexdooda ah xalliyaan waxay u soo ban-dhigayaan Guddida Ilaalinta Anshaxa Doorashada;
- 3) Haddii arrintu ay tahay mid aanay waxba ka qaban karaynin Guddidaasi waxaa loo soo gudbinayaa Komishanka Doorashooyinka.

QODOBKA 23aad: CABASHOYINKA

Xisbi kastaa waxa uu Cabasho u soo gudbiyanayaa Guddida Ilaalinta Anshaxa Doorashooyinka ee lagu aasaasay Qodobka 25aad ee Xeerkan Hab-dhaqan, haddii uu u arko in lagu xad-gudbay Xeerkan Hab-dhaqan;

- 1) Iyadoo lagu xisaabtamayo wakhtiga, Cabashooyinka la soo gudbiyo waa in si dhakhso ah baadhis loogu sameeyo go'aanna laga gaadho;
- 2) Cabashooyinku waa in ay qoraal ahaadaan, laguna soo hagaajiyaa Guddida Anshaxa;
- 3) Cashasho kasta waa in ay ku cadahay xisbiga laga cabanayo iyo asbaabta looga cabanayo, oo mudaysan, isla markaana goobaysan, waana in ay wadataa cadaynta lagama maarmaanka ah;
- 4) Guddida Ilaalinta Anshaxa Doorashooyinku, waa in ay si madax banaan u baadhaan, u xaqiijiyaan, isla markaana muddo saddex cisho gudahood ah go'aan uga gaadhaan cabasho kasta oo soo gaadha;
- 5) Xisbiyada Siyaasaddu waxa ay ku dedaalayaan in wixii cabasho ah ee dhexdooda ah ay ku dhameeyaan is-afgarad iyo wada xaajood;



QODOBKA 24aad: CABASHOYINKA BEEN-ABUURKA AH (ABUSE OF COMPLAINT PROCEDURE)

Xisbiyada Siyaasaddu waa in aanay ku xad-gudbin xuquuqda soo gudbinta cabashooyinka. Waa in aanay samaynin cabasho been-abuur ah (false, frivolous and vexatious complaints) oo lagu jahawareerinaayo geeddi-socodka doorashooyinka.

QAYBTA AFRAAD

QODOBKA 25aad: GUDDIDA ILAALINTA ANSHAXA DOORASHOYINKA

1. Ujeeddada Loo Aasaasay Guddida



Guddida Illaalinta Anshaxa Doorashooyinka waxa loo aasaasay kor-u-qaadista suurto-galnimada in ay doorasho xor iyo xalaal ahi xilligeedii dalka kaga qabsoonto, iyo in ay doorashadaasi ku qabsoonto kuna gebo-gebawdo turxaan la'aan, si waafaqsan Sharciga iyo Xeerarka dalka.

2. Xilka Guddida:

Guddidu waxay u xilsaaran tahay:

- a. Ilaalinta Habsami-ugu-dhaqanka Xeerarka Doorashooyinka iyo Xeerkan Hab-Dhaqanka Xisbiyada Siyaasadeed.
- b. Xallinta khilaafaadka iyo murannada la xidhiidha Xeerka Hab-dhaqanka Xisbiyadda ee ka dhex dhasha laba dhinac ama ka badan oo ka mid ah dhinacyada ku loollamaaya doorashada,
- c. Soo-saarista warbixino ku saabsan sida dhinacyadu ugu dhaqmayaan Xeerarka Doorashooyinka, Xeerka Hab-Dhaqanka Xisbiyada iyo guud ahaanba Geedi-socodka Doorashada.





4. Awoodda Guddida

Guddidu waxay awood u leedahay:

- a. Xallinta khilaaf kasta oo ka dhex-dhasha dhinacyada Xeerkan Hab-Dhaqan kala saxeexday;
- b. Hubinta meel-marinta Xeerka Hab-Dhaqanka ee Xisbiyada Siyaasadeed;
- c. Ka qaadista tallaabo anshax-marineed oo Xeerka Hab-dhaqan waafaqsan xad-gudub kasta oo Guddida ama wakiilladeedu ogaadeen dhicitaankiisa.
- d. Tallaabada anshax-marineed ee ay Guddidu soo saartaa ama qaaddaa wuxuu noqonayaa mid qaadashadiisu waajib ku tahay dhinacyada uu khuseeyo, si waafaqsan Xeerarka doorashooyinka, Xeerka Diiwaan-gelinta iyo Xeerka Hab-dhaqanka Xisbiyada (Code of Conduct).

5. Tirada Xubnaha Guddida iyo Qaabka Soo-Xulisteeda

- a. Guddidu waxay ka kooban tahay Toddoba aqoonyahan oo reer Somaliland ah.
- b. Guddidu waxa ay iska dhex doorayaan Guddoomiye, Guddoomiye Ku-xigeen iyo Xog-haye. Guddida waxaa soo xulaaya isla markaana magacaabaaya Komishanka Doorashooyinka Qaranka.




17


- c. Toddobada xubnood ee reer Somaliland waxa soo xulaaya Komishanka Doorashooyinka Qaranka.
- d. Guddidu waxay lixda gobol-doorasho ee dalka ku yeelanaysaa min laba wakiil oo KDQ uu soo xulo. Iyagoo Guddidu u igmanaaya in ay waajibaadkooda ka fuliyaan Gobollada.

6. Shuruudaha Lagu Soo Xulayo Xubinta Guddida

Guddida ahi waa in ay buuxiso shuruudahan hoos ku qoran:




- a. In uu yahay/tahay qof sumcad wanaagsan ku leh bulshada.
- b. Qof leh Go'aan qaadasho, karti, aqoon iyo waayo-aragnimo uu ku gudan karo mas'uuliyadda culus ee la saaray,
- c. Ku sifoobay dhexdhexaadnimo siyaasadeed.
- d. In uu leeyahay/leedahay xirfad uu ku qoro/qorto warbixin (report writing skills).

7. Tallaabooyinka ay Guddidu ka Qaadi Karto Cidda ku Xad-Gudubta Xeerkan Hab-Dhaqan

- a. Dhinaca ka mid ah dhinacyada ay Guddidu ku leedahay ilaalinta, ee ku xad-gudba arrin ay hab-dhaqankeeda caddeeyeen Xeerarka doorashooyinka, Xeerka Diiwaan-gelinta ama Xeerkan Hab-Dhaqanku, waxay Guddidu ku anshax-marinaysaa:
 - i Digniin caadi ah;
 - ii Ka-joojin Xisbiga ama musharraxa/musharraxiinta, muddo cayiman ama si joogto ah, adeegsiga warbaahinta dawladda iyo tan madaxbannaanba.
 - iii Ka-joojin Xisbiga, muddo cayiman, in uu sameeyo kulammo dadweyne, bannaan-bax ama dhoollo-tus siyaasadeed, olole doorasho IWM;
 - iv Ku rido ganaax idaari ah oo lacageed oon ka badnayn 200,000,000 (laba boqol oo milyan oo Shilinka Somaliland ah);
 - v Ka joojiyo ololaha doorashada qayb ahaan ama gabi ahaanba.
- i. Gaddiidka aan haysan ruqsada dhaqdhaqaaq ee KDQ oo ay u cadaato Guddida inuu ku jiro olole aan waafaqsaneyn Xeerka Hab-dhaqanka, waxay u gudbin doonaan

Ciidanka amniga si ay u xayiraaan socodkiisa.

- ii. Gaadiidka Dawladda looma isticmaali karo Ololaha Doorashada iyo maalinta Doorashada, qofkii lagu qabtana guddidu way ka dhigaysaa.







- iii. Qaadista tallaabadii kale ee anshax-marineed ee ugu muuqata in ay ku habboon tahay;
 - iv. U-gudbinta hay'adaha sharci-fulinta warka iyo macluumaadka cid kasta oo hawsha ay Guddidu ilaalinteeda u xil-saaran tahay ka gasha danbi gaadhsiisan dembi ciqaabeed (oo ay Guddidu hesho warkiisa) iyo la-socodka tallaabada ay hay'adaha sharci-fulintu ka qaadaan arrintaas;
- b. Wasiirka ama sarkaalka kale ee dawladeed ee ku xad-gudba Xeerarka Doorashooyinka, Xeerka Diiwaan-gelinta ama Xeerkan Hab-Dhaqan, tallaabada anshax-marineed ee ay Guddida ugu muuqato in laga qaado oo qoraal ah waxay u gudbinaysaa KDQ; waxaanay la soconaysaa inuu KDQ tallaabadii ku habboonayd uu ka qaaday iyo in kale;
- c. Mas'uulka ama hawl-wadeenka Xisbi ee ku xad-gudba Xeerarka Doorashooyinka, Xeerka Diiwaan-gelinta ama Xeerkan Hab-Dhaqan, tallaabada anshax-marineed ee ay Guddida ugu muuqato in laga qaado oo qoraal ah waxay u gudbinaysaa KDQ; waxaanay la soconaysaa inuu KDQ tallaabadii ku habboonayd uu ka qaaday iyo in kale;
- d. Masuulka ama hawl-wadeenka Xisbi ama taageere xisbi ee ay ku cadaato in uu ku kacay falal wiiqi kara amniga, nabad-gelyada, ama sameeya abaabul hubaysan, ama kicin dadweyne, ama lagu helo haddalo fitno abuuraya, dadka kala fogeynaya oo ku dhisan shakhsi weerar, caytan, qabyaalad iyo kicin waxa laga qaadayaa talaabo anshax marineed oo deg-deg ah, waxana lagu wargalinayaa ciidamadda amnigu in ay sida ugu dhakhsaha badan u qabtaan una horgeeyaan hay'adaha baadhista iyo garsoorka si loogu oogo danbiga uu galay.
- e. Guddidu waxay ku baahinaysaa warbaahinta xad-gudub kasta oo ay cidi kula kacdo Xeerarka Doorashooyinka, Xeerka Diiwaangelina iyo Xeerkan Hab-Dhaqanka iyo tallaabada ay ka qaadayba, iyadoo weliba Guddidu ay dib ka baahin doonto sida looga waantoobay xad-gudubyadii ay tallaabada anshax-marineed ka qaaday

8. Muddada Xilka ee Guddida

Guddidu waxay hawsheeda bilaabaysaa isla marka Komishanku dhammays tiro magacaabisteeda, waxaanay ku egtahay marka uu Komishanku ku dhawaaqo natiijada Ku-meel-gaadhka ah ee doorashada.

9. Wadashaqeynta KDQ iyo Guddida:



19



NR

- a. Guddida Illaalinta Anshaxa Doorashooyinku wey u madaxbaanaaneysaa hawlhooda shaqo, iyagoo marwalba latashi la yeelanaya KDQ.
- b. Wixii tallaabo anshax marineed ah ee ay Guddidu soo jeediso waxay u gudbineynsaa KDQ si loo fuliyo.
- c. Xisbiyada Siyaasadda iyo Murashaxiintoodu waa in ay wada shaqayn iyo gacanba siiyaan Guddida Illaalinta Anshaxa Doorashooyinka. Waana in ay ku taageeraan shaqadooda.

QAYBTA SHANAAD




QODOBKA 26^{aad}: TALLAABOYINKA LAGA QAADAYO CIDDA XEERKAN JEBISA

Xisbi kasta oo ka qayb qaadanaaya doorashada ama hawl-wadeen Xisbi, xubin Xisbi, taageere Xisbi iyo murashax doorasho ee ku xadgudba Xeerkankan, Komishanka Doorashooyinku wuxuu ka qaadanayaa go'aamo anshax marineed sida:

- a) Digniin caadiya;
- b) In laga joojiyo Xisbiga wakhti cayiman ama si joogto ah adeegsiga warbaahinta Dawladda iyo ta madaxa banaan;
- c) In Xisbigaasi laga joojiyo wakhti cayiman inuu sameeyo kulamo dadweyne, banaan-baxyo ama inuu tago gobol doorasho si uu uga soo ololeeyo ama uga taago boodhadh, halku-dhagyoo ama calaamadda xisbiga
- d) In lagu ganaaxo xisbigaasi ganaax idaari ah oo lacageed oon ka badnayn 200,000,000 (laba boqol oo milyan oo Shilinka Somaliland ah);
- e) Ka joojiyo ololaha doorashada qayb ahaan ama gabi ahaanba.
- f) Haddii danbiyadda dhacay ay noqdaan kuwo ka culus awoodda Komishanka Doorashooyinka Qaranka ama xad-gudubyada dhacay ay yihiin kuwo dambi ciqaabeed ka dhalan karo, waxaa Komishanka Doorashooyinku u gudbinayaa Hay'addaha ay khusayso arrintaasi;
- g) Wixii khilaaf ah ama farsamo ah ee xallintooda laga waayo Dastuurka Qaranka, Xeerarka Doorashooyinka, Xeerka Diiwaan-gelinta iyo Xeerkan Hab-dhaqanka Xisbiyada waxa xal ka gaadhaya Komishanka Doorashooyinka Qaranka.

QODOBKA 27^{aad}: KU DHAQANKA IYO WAX KA BEDDELKA XEERKAN HAB-DHAQAN

- a) Xeerkan Hab-dhaqan nuxur ahaan wuxuu waafaqsan yahay shuruucda doorashooyinka ee dalka u yaalla sida: Dastuurka Qaranka, Xeerarka Doorashooyinka, iyo Xeerka Diiwaan-gelinta Codbixiyeyaasha;
- b) Xeerkan Hab-dhaqan waxaa lagu dabaqayaa xaaladaha aanay shuruucda dalka ee doorashada khuseeyaa wax ka jidaynin;


 20



- c) Xeerkan waxaa lagaga dhaqmayaa xarunta dhexe ee KDQ, xarumaha doorashooyinka gobollada iyo degmooyinka iyo goobaha doorashada;
- d) Xeerkan waxaa ku dhaqmaaya fulintiisana ilaalinaya Saddexda Xisbi Qaran, taageerayaashooda, murashixiintooda, iyo saraakiishooda iyo KDQ;
- e) Wax ka beddelka Xeerkan wuxuu ku iman karaa marka dhinacyada wada saxeexay ay ka wada tashadaan kana heshiiyaan waxa lagu darayo iyo waxa laga saarayo.

QODOBKA 28^{aad}: AWOODDA SAXIIXA

Xeerkan Hab-dhaqan waxaa saddexda Xisbi Siyaasadeed ee Qaranka u saxeexay saddexda Guddoomiye ee Xisbiyada Siyaasadda.

WAXAA LAGU SAXIIXAY HARGEYSA, MAANTA OO AH SALAASA LIX IYO LABAATANKA BISHA SAGAALAAD EE LABADA KUN IYO TODOBA IYO TOBAN.

XISBIGA UCID

Mudane Feysal Cali Xuseen
Guddoomiyaha Xisbiga UCID



XISBIGA KULMIYE

Mudane Muuse Biixi Cabdi
Guddoomiyaha Xisbiga KULMIYE



XISBIGA WADDANI

Mudane C/raxmaan C/laahi Cirro
Guddoomiyaha Xisbiga Waddani



KOMISHANKA DOORASHOYINKA QARANKA

Eng. Abdiqaadir Iimaan Warsame

Guddoomiyaha Komishanka Doorashooyinka Qaranka

